

釋迦譜卷第七

蕭齊釋僧祐撰

綵七

釋迦子羅云出家緣記第十三

釋迦姨母大愛道出家緣記第十四

釋迦父淨飯王泥洹記第十五

釋迦母摩耶夫人記第十六

釋迦姨母大愛道泥洹記第十七

釋迦種滅宿業緣記第十八

釋迦子羅云出家緣記第十三

出家曾有經

余時世尊告目犍連汝今往彼迦毗羅城問
訊我父闍頭檀王并我姨母波闍波提及三
叔父斛飯王等因復慰喻羅睺羅母耶輸陀
羅令割恩愛放羅睺羅令作沙彌修習聖道
所以者何母子恩愛歡樂須臾死墮地獄母
之與子各不相知窈冥冥冥永相離別受苦
萬端後悔無及羅睺得道當還度母永絕生
老病死根本得至羅漢如我今也目連受命
屈伸臂頃到迦毗羅淨飯王所而白王言世

尊慇懃致問無量起居輕利氣力安不及大
夫人波闍波提并三叔父斛飯王等問訊起
居亦復如是時耶輸陀羅聞佛遣使來至王
所未知意趣即遣青衣令參消息青衣還白
世尊遣使取羅睺羅度爲沙彌耶輸陀羅聞
是消息將羅睺羅登上高樓約勒監官關閑
門閭悉令堅牢時大目連既到宮門不能得
入又無人通即以神力飛上高樓至耶輸陀
羅座前而立耶輸陀羅見目連來憂喜交集
迫不得已即起禮拜勑爲敷座請目連坐問
目連曰世尊無恙教化衆生不勞神也遺上
人來欲何所爲目連白曰太子羅睺年以九
歲應令出家修學聖道所以者何母子恩愛
少時如意一旦命終墮三惡道恩愛離別窈
冥冥母不知子子不知母羅睺得道當還
度母永度生老病死憂患得至涅槃如佛今
也耶輸陀羅答目連曰釋迦如來爲太子時
娶我爲妻奉事太子如事天神曾無一失共

爲夫婦未滿三年捨五欲樂騰越宮城逃至王田王身往迎違戾不從返遣車匿白馬令還自要道成誓願當歸被鹿皮衣譬如狂人隱居山澤勲苦六年得佛還國都不見親忽忘恩舊劇於路人使我母子守孤抱窮今復遣使欲求我子爲其眷屬何酷如之太子成

綵七二

道自言慈悲慈悲之道應安樂衆生今反離别人之母子苦中之甚莫若恩愛離別之苦以是推之今別人母子何慈之有白目連曰還向世尊宣我所陳時大目連更以方便種種諫喻曉耶輸陀羅而耶輸陀羅絕無聽意辭退還到淨飯王所具宣上事王聞是已即

告夫人波闍波提我子悉達遣目連來迎取羅云欲令入道修學聖法耶輸陀羅女人愚癡未解法要心堅意固纏著恩愛情無縱捨卿可往彼重陳諫之令其心悟時大夫人即便將從五百青衣至其宮中隨宜諫喻反覆再三耶輸陀羅猶故不聽白夫人曰我在家

時八國諸王競來見求父母不許所以者何釋迦太子才藝過人是故父母以我配之太子余時知不住世出家學道何故懲勸苦求我耶夫人娶婦正爲恩好聚集歡樂萬世相承子孫相續紹繼宗嗣世之正禮太子既去復求羅睺欲令出家永絕國嗣有何義哉余

時夫人聞是語已默然無言不知所云余時世尊即起化人空中告言耶輸陀羅汝頗憶念往古世時誓願事不我當余時爲菩薩道以五百銀錢從汝買得五莖蓮華上定光佛時汝求我世世所生共爲夫妻我不欲受即語汝言我爲菩薩累劫行願一切布施不逆

綵七三

人意汝能余者聽爲我妻汝立誓言世世所生國城妻子及與我身隨君施與誓無悔心而今何故愛惜羅睺不令出家學聖道也耶輸陀羅聞是語已霍然還識宿業因緣事事明了如昨所見愛子之情自然消歇遣喚目連懺悔辭謝捉羅睺手付囑目連與子離別

涕淚交流。尔時羅睺見母愁苦長跪合掌前。白母言願母莫愁羅睺今往定省。世尊尋余當還與母相見時淨飯王爲欲安慰耶輸陀羅令其喜故即集國中豪族而告之言金輪王子今當往彼舍婆提國從佛出家學道願鄉人人各遣一子隨從我孫咸皆奉命即時合集有五十人隨從羅睺往到佛所頭面作禮佛使阿難剃羅睺頭及其五十諸公王子悉令出家命舍利弗爲其和尚大目犍連作阿闍梨授十戒法便爲沙彌。尔時佛子羅云等五十沙彌聞佛說彼扇提羅等罪報因緣宿緣罪報文繁不載。甚大憂懼即各頭面禮

佛白言世尊今聞說此扇提羅等甚懷怖懼所以者何和尚舍利弗大智福德國中供養最上甘珍小兒愚癡無有福德食人如是妙好飲食後世當受苦果如扇提羅是故我等實懷憂慮願佛垂哀賜聽我屬捨道還家冀免罪咎。尔時世尊告羅睺羅汝今畏罪還家求離苦者是事不然何以故譬如二人乏食飢餓忽遇主人爲設種種肥濃美味其人飢餓貪食過飽然此二人一者有智一者愚癡有智之人自知食過身體沉重頻伸欠呴即詣明醫請除苦患良醫即賜摩檀提藥令其服之吐宿食已令近暖火禁節消息得免禍患終保年壽其無智者不知食過謂是鬼魅煞生祠祭欲求濟命腹中宿食遂成生風絞切心痛因是死亡生地獄中佛告羅睺羅汝畏罪還家如彼無智愚癡人也汝先有善根因緣遭值我時如彼明醫能濟苦患而不得死汝今何爲捨明入闇羅睺白言世尊諸佛續七

四

智慧猶如大海羅睺等心猶如毫末豈能受持如來智慧佛告羅睺如天雨滴後不及前雖不相及能滿大器修學智慧亦復如是從小微起終成大器如是展轉滿無量器是則自利利人名爲大士如我今也羅睺羅等聞佛說已心開意解普耀經云佛還入宮坐於

殿上俱夷携羅雲來誓首佛足占對問訊時王僚屬皆懷沉疑太子捐國十有二年何從生子佛語父王告諸羣僚俱夷守節貞潔清無瑕疵設王不信今當現證於時世尊化諸衆僧皆使如佛羅云年始七歲俱夷即以指印信環與羅睺言是汝父者以此與焉羅云應時直前詣佛以印信環而授世尊王及羣臣咸皆欣踊稱言善哉真佛子也佛語父王及諸臣曰從今已後無復懷疑此吾之子緣吾化生勿各俱夷王得道證俱夷持戒淨修梵行彌沙塞律云佛往到淨飯王宮時羅睺羅母將羅睺羅在高樓上遙見佛來語言汝見彼沙門不答言見又語言彼是汝父可往索父餘財佛既入宮於中庭露地坐羅睺羅馳下趣佛頭面禮足住佛影中白言是影甚樂願佛與我父餘財佛言汝審欲得不答言欲得佛便將還告舍利弗汝可度之舍利弗即度出家爲受沙彌戒時淨飯王聞已度羅

綵七

五

睺羅便大懊惱出詣佛所白言佛昔出家尚有難陀不能令我如今懊惱難陀已復出家餘情所寄唯在此子今當出家家國大計求爲斷絕子孫之愛徹過骨髓如何比丘輒度他子願佛從今勑諸比丘父母不聽不得爲道佛即爲王說諸法竟集諸比丘立制父母不聽不得出家受戒祐尋此律所說羅睺羅出家緣與未曾有經事緣大異者由於爾時對情不同故復兩存焉祐尋釋族爲盛雲布赤澤雖法俗或殊而獲道斯同難陀棄榮談以從道羅云捨輪王位而襲法梅檀圍遶龍象成羣靡親靡疎隨應而度調御之美於茲可見

釋迦婆母出家緣記第十四

出中本起經

佛還迦維羅衛國大愛道瞿曇彌訖誓首作禮白佛言我聞女人精進可得沙門四道願得受佛法律我以居家有信欲出家爲道佛言且止無樂以女人入我法律服法衣者當不

盡壽清淨究竟暢梵行瞿曇彌財復求哀如是至三佛不聽許作禮而退佛於後時更遊迦維羅衛瞿曇彌財前求出家佛亦不許佛又與諸比丘留止是國避雨三月竟出國而去大愛道與諸老母等俱行追佛頓止河上大愛道便前作禮復求出家佛言止止如前不

許便前作禮遶佛而退住於門外被弊敗衣徒跣而立顏面垢穢衣服塵汚穢而啼阿難見之即問何以如是答言今我以女人故不得出家自悲傷耳阿難言止止且自寬意待我白佛阿難即入聳首白言我從佛聞女人精進可得四道今大愛道以至心欲受法律願佛聽之佛言止止無樂欲使女人入我法律爲沙門也所以者何譬如人家生子多女少男當知是家以爲襄弱若聽女人出家乃令佛法清淨梵行不得久住譬如稻田莠雜禾稼則令善穀復敗若使女人入我法律必令清淨大道不興盛阿難復言大愛道

經七

六

多有善意佛初生時乃自育養至于長大佛言如是大愛道信多善意於我有恩今我成佛於大愛道亦多有恩大愛道但由我故得歸依三寶不疑四諦立信五根受持五戒如是阿難正使有人終身相給衣被飲食卧具病困醫藥不及我此恩德也佛告阿難假使女人欲作沙門者八敬之法不得踰越當盡壽學行之譬如防水善治堤塘勿令漏失其能如是可入律法阿難諦受作禮而出報大愛道言瞿曇彌財何忽憂愁即爲再說佛之言教若能如是可得出家大愛道即歡喜而言唯諾阿難聽我一言譬如四姓家女沐浴塗香好衣莊嚴而人復以好華香珍寶爲步搖持與其女豈不愛樂頭首受之今佛所教勑八敬法者我亦歡心願以首頂受之爾時大愛道便得出家尋受大戒爲比丘尼奉行法律遂得應真後於異時大愛道與諸長老尼俱詣阿難所白吉諸長者尼皆久修梵行且

已見諦云何當使禮幼少比丘阿難言且停
我今當問佛阿難即往白佛佛言止止當慎
此言勿得說也且汝所知不如我知若使女
人不出家者外道異學一切賢者當以四事
種種供養解髮布地請令蹈之如事日月如
事天神我之正法當千歲興盛以度女人故

釋七

七

至五百歲而漸衰微所以者何女人有五處
不能得作何謂爲五一不得作如來二不得

作轉輪聖王三不得作第二忉利天王四不
得作第六天魔王五不得作第七梵天王大
愛道等聞已歡喜奉行

彌沙塞律云大愛道出家受行八敬事事悉
同大愛道因阿難問佛大愛道受八敬即得
具足戒不知諸釋女五百人云何佛言將往
大僧中十衆大愛道作和尚羯磨與受具足
三人一受不得四人大方便經云天魔波旬
及諸長夜惡邪見人毀佛法僧是故如來不
聽女人樂入佛法佛姨母橋曇彌三請不聽

憂悲苦惱阿難爲請過去諸佛具四部衆而
如來獨不具耶佛告阿難若橋曇彌發大精
進修八敬法聽入佛法橋曇彌心大歡喜佛
言未來世中若有比丘尼及諸善女人常當
志心念阿難恩稱名供養阿難以大威神應
聲護祐仰惟三世諸佛四部咸備而橋曇
彌祈法亟於拒塞者豈非女人障厚方爲道
蠶故切磋掊擊以勵將來也

釋迦父淨飯王泥洹記第十五

出淨飯王泥洹經

舍夷國王名曰淨飯治以正法化德仁義常
行慈心時被重病身中四大同時俱作殘害
其體肢節欲解喘息不定如駛水流輔相宣
令國中明醫皆悉來會種種療治無能愈者
時王煩惱轉側不停如少水魚夫人嫁女見
王如是益更愁惱時白飯王斛飯王大稱王
等及諸羣臣同發聲言今王設崩求失覆護
國將虛弱王身戰慄脣口乾燥語聲斷絕眩
冒淚下時諸王等長跪叉手同共白言大王

素性不好作惡經彈指頃種德無厭護養人民莫不得安名聞十方大王今日何故愁惱時淨飯王語聲趣出告諸王曰我命雖斷不以爲苦但恨不見我子悉達又恨不見次子難陀以除貪婬世間諸欲復恨不見斛飯王子阿難陀者持佛法藏一言不失又恨不見

經七

八

孫子羅云年雖幼稚神足純備戒行無缺吾設得見是諸子等我病雖篤夫離生死不以爲苦諸在王邊聞如是語悉苦啼泣淚下如雨時白飯王言我聞世尊在王舍城耆闍崛山中去此懸遠五十由日王今轉羸設遣使者道路懸邈遲晚無益唯願大王莫大愁悒

勝世間王是我曹父今得重病我曹應往及命存在得與相見令王願滿難施受教長跪作禮唯然世尊淨飯王者是我曹父能生聖子利益世間今宜往詣報育養恩阿難合掌前白佛言淨飯王者是我伯父聽我出家爲佛弟子是故欲往羅云復前而白佛言世尊雖是我父棄國求道我蒙祖王育養成就而得出家是故欲往觀省祖王佛言善哉宜知者何我子成佛以大慈悲恒以神通天眼徹視天耳徹聽救接衆生應可度者如有百千萬億衆生爲水所溺以慈愍心爲作船筏而度脫之終不疲勞若我今日望見世尊亦復

經七

九

啼哭白世尊言大王如是命斷不久唯願如來宜可時往及共相見國中人民宛轉自撲哽咽啼哭中有自絕瓔珞者中有取塵土而自坌者佛見是已諫國人曰無常離別古今有是汝等諸人當思念之生死爲苦唯道是真於是世尊即以十力四無所畏十八不共諸佛之法放大光明更復重以三十二相八十種好放大光明以從無量阿僧祇劫所作功德放大光明其光照曜內外通達周遍國界光照王身患得安息王遂怪言是何光耶爲是日月之光明耶諸天光乎來觸我身如天栴檀令我身中患苦得息脫是我子悉達來也先現光明是其常瑞時大稱王從外入宮白大王言世尊已來將諸弟子阿難陀云等乘空來至王宜歡喜捨愁毒心王聞佛來敬意踊躍不覺起坐須臾之頃佛便入宮王見佛到遙舉兩手接足而言唯願如來手觸我身令我得安爲病所困如壓麻油痛不可

忍我命將斷寧可還返我今最後得見世尊痛恨即除佛知父王病重羸瘦色變難識告難陀言觀王本時形體巍巍顏色端正名聲遠聞今得重病乃不可識端正形容勇健之名今何所在時淨飯王一心合掌讚嘆世尊德佛言唯願父王莫復愁悒所以然者道德純備無有缺減佛出金色臂掌如蓮華尋即以手著父王額上王是清淨戒行之人心垢已離今應歡喜不宜憂惱當諦思念諸經法義物不牢固得堅固志以種善根是故大王宜當歡喜命雖欲終自可寬意時大稱王以恭敬心白淨飯王言佛是王子神力具足無
緣七

十
與等者次子難陀亦是王子已度生死諸欲之海四道無礙斛飯王子阿難陀者已服法味佛所說法猶若淵海一句不忘悉摠持之王孫羅云道德純備逮諸禪定成四道果是四子等以壞魔網時淨飯王聞是語已歡喜踊躍不能自勝即以自手捉於佛手著其心

上王於卧處合掌心禮世尊足下時佛手掌
故在王心上無常對至命盡氣絕忽就後出
於是諸釋號咷哭舉身自撲兩手拍地解
髻亂髮同發聲言求失覆蓋王中尊王今以
崩背國失威神時諸釋子以衆香汁洗浴王
身纏以劫波育氍及諸縉帛而以棺殮於師

子座七寶莊校真珠羅網垂達其傍舉棺置
於師子座上散華燒香佛共難陀在喪頭前
肅恭而立時阿難羅云住在喪足難陀長跪
白佛父王養我願聽難陀擔父王棺阿難陀
長跪白佛言唯願聽我擔父王棺羅云復前
而白佛言唯願聽我擔祖王棺尔時世尊念
當來世人皆兇暴不報父母育養之恩爲是
當來不孝衆生設化法故如來躬欲擔於父
王之棺即時三千大千世界六種震動一切
衆山嶺峨涌沒如水上船尔時欲界一切諸
天與無數百千眷屬俱來赴喪北方天王毗
沙門王將諸夜叉鬼神之等億百千衆俱來

經七

十一

赴喪東方天王提頭賴吒將諸妓樂鬼神之
等億百千衆俱來赴喪南方天王毗樓勒叉
矜究槃茶鬼神之等億百千衆俱來赴喪西
方天王毗留博叉將諸龍神億百千衆俱來
赴喪皆共發哀舉聲啼哭時四天王竊共思
議瞻望佛爲當來世諸不孝父母者故以大
慈悲親欲自身擔父王棺時四天王俱共長
跪同時發聲俱白佛言我等是佛弟子從佛
聞法成須陀洹以是之故我曹宜擔父王之
棺佛聽四天王擔父王棺四天王各自變身
如人形像以手擎棺擔著肩上舉國人民一
切大小莫不啼泣爾時世尊威光益顯猶萬
日並現如來躬自手執香爐在前行出詣於
墓所靈鷲山上有千阿羅漢以神足力乘虛
而至稽首佛足復白佛言唯願佛勑使作何
事時佛便告諸羅漢等汝等疾往大海諸上
取牛頭栴檀種種香木即受教勑如彈指頃
各到大海共取香薪屈伸臂頃便已來到佛

與大眾共積香薪舉棺置上以火焚之一切

大眾見火熾然皆向佛前宛轉自撲益更悲哭有得道者皆自慶幸未獲道者心戰惶怖毛衣爲堅佛告四衆曰世間無常苦空非身無有堅固如幻如化如熱時燄如水中月命不永居汝等諸人但見此火便以爲熱諸欲

之火恒復過此是故汝等當自勸勉求離生死乃得大安時火熾燒王身已余時諸王各各皆持五百瓶乳以用滅火火滅之後競共收骨盛置金函即於其上便共起塔懸繒幡蓋供養塔廟時諸大眾同時發聲俱白佛言大淨飯王今已命終神生何所唯願世尊分別解說於時佛告衆會曰父王淨飯是清淨人生淨居天祐觀無常之變甚矣固有形之類而莫免也夫以天尊侍疾而不能延齡金掌在心而無救理報盡數終無常對至是以聖人修長壽之果而不養蕉寐之身也

釋迦母摩訶摩耶夫人記第十六

卷一

十二

出佛昇忉利天爲母說經

佛在忉利天歡喜園中波利質多羅樹下三月安居余時如來四衆圍遶身毛孔中放千光明普照三千大千世界一一光中有千葉蓮華一一華中皆有化佛威光照曜不可譬類諸天子等不知何緣而有此事佛告文殊汝詣母所道我在此願母暫屈禮敬三寶文殊即往宣白摩耶摩耶聞已乳自流出而作此言若審我所生悉達多者當令乳汁直至於口作此語已兩乳漿出猶白蓮華而便入於如來口中時摩耶見已踊躍怡悅如華開榮大千世界普皆震動諸妙華果非時敷熟即語文殊我從與佛爲母子來歡喜安樂未曾如今日也即與文殊俱趣佛所世尊遙見母來如須彌山鼓動之相便以梵音而白母言身所經處與苦樂俱當修涅槃永離苦樂摩耶一心五體投地專精正念結使消伏佛爲說法摩耶聞已即識宿命善根純熟破八

十億熾然之結得須陀洹果即白佛言生死牢獄已證解脫時會大衆聞此語已異口同音而作是言願一切衆生皆得解脫尔時世尊於忉利天爲衆廣說大有利益至三月盡將欲還下命鳩摩羅汝今可下至閻浮提語言如來不久當入涅槃于時衆生聞是語已極大愁惱作如是言我等頃來不知大師所在今者乃在忉利天上又復不久欲入涅槃何其苦哉世眼將滅我等罪身天人殊絕無由昇天恭敬勸請唯願仁者爲宣啓請唯願愍念閻浮提人時速還下時鳩摩羅還至佛所具以白佛尔時世尊聞此語已放五色光明照耀顯赫時天帝釋知佛當下即使鬼神作三道寶階中央閻浮檀金左用琉璃右用瑪瑙欄楯雕鏤極爲嚴麗佛語摩耶生死之法會必有離我今應下還閻浮提不久亦當入於涅槃摩耶垂淚說偈尔時世尊與母辭別下躡寶階梵天執蓋及四天王侍立左右

釋
十三

華燒香導從來下閻浮提王波斯匿等一切大衆集在寶階稽首奉迎佛還祇洹處師子座四衆圍遶歡喜踊躍

十三

同然摩耶積因託化誕聖是以既爲天師而方味其乳已入泥洹而還起致敬欲報之德於斯至矣

釋迦姨母大愛道泥洹記第十七 出佛母泥洹經王園精舍大愛道比丘尼即佛姨母也將欲滅度曰吾不忍見世無如來無所著正真道最上正覺及諸應真滅度吾當先息靈神還于本無矣佛一切智具照其心即告阿難大愛道念曰吾不忍見世尊并諸應真等泥洹欲先滅度阿難聞教即稽首言今聞尊命四體萎墮心塞智索不識四方之名佛告阿難沒謂大愛道滅度將戒定慧解脫度知見種四意止乃至八品道行去耶對曰不也但惟

佛生七日太后薨沒慈母至有彌恩在佛所耳世尊嘆曰如汝所言慈母於吾實有哺乳重恩此恩難報吾已報之我亦有難笄之恩在母所也由我開示歸命三寶苦集盡道眼明盡諸有結獲無所著若人能悟愚者之惑令入真正苦集盡道者恩過須彌是故阿難

經七

十四

吾有重恩於大愛道爲無量也於時大愛道與除饉女五百人除饉女即比丘尼也康會注法鏡經云凡夫貪染六塵猶餓夫夢食不知厭足聖人斷除饉故號出家爲除饉俱到佛所皆頭面著佛足禮退叉手立白佛言不忍覩佛及諸應真滅度欲先泥洹佛默可之大愛道以手摩佛足曰此晚覩如來最上正覺自

今已後不復覩矣五百除饉陳辭如上佛可之爲說身患滅度之安諸除饉女莫不歡喜繞佛二而稽首而去還于精舍布五百座皆各就座大愛道現神足德於自座沒從東方來在虛空中作十八變八方上下亦復如是放大光明以照諸冥上耀諸天五百除饉變

化俱然同時泥洹佛告阿難汝明日入城到耶遊理家所理家即優婆塞受戒在家故曰理家告之曰佛母及五百耆年除饉皆已滅度佛勸理家作五百舉床麻油香華樟楠梓栴檀事各五百真妓正音當以供養所以者何斯諸除饉皆六通四達獲空不願無想淨定今得泥洹爲佛所嘆一時供養其福無量阿難稽首敬諾平旦入城至理家門聞阿難來心怖毛豎今來甚早斯事非恒將以何故阿難如教具爲宣說理家聞之即躋身于地抗哀而云自今惟耶梨精舍都爲空寂王道四街不復覩神通除饉國道爲空其痛何甚乎阿難答曰佛說軀

經七

十五

坤雖久始必有終三界無常如幻如夢生求不死會冀不離者終不可得也理家心解歡喜阿難復至諸梵志理家值集在講堂有異論議即告之曰佛勸諸賢者作五百祭具所以然者佛母五百除饉皆以滅度梵志理家聞阿難言靡不躋地宛轉哀號阿難又說三

界如幻都爲非常身爲苦器惱痛所聚唯泥洹安故聖歸之理家心解誓首奉辦阿難還至佛所如事以聞梵志理家即備葬具馳詣精舍時王園門閉理家使人緣入開門欲入講堂有女沙彌三人一人得不還道次者頻來小者溝港告理家曰吾師坐禪今得寂定慎勿擾動答曰師已滅度非爲定耶沙彌聞之躋身絕息有頃乃蘇哀而言曰誰當教誨吾等聖訓絕矣理家覩之莫不哀泣告沙彌曰佛本說經恩愛雖會終必有離但當建志力取應真理家闍維畢捧舍利詣佛所佛告阿難汝東向叉手下右膝曰有直信直業三神六智道靈已足者來趣斯所以然者佛母及諸除餓女五百人今皆善逝宜當法會四方俱然於是四方各二百五十應真神足飛來稽首佛足佛起至大愛道舍利所千比丘從皆就座佛告阿難取舍利盛之以鉢著吾手中阿難如命以鉢盛舍利長跪授佛佛以

兩手受之告諸比丘斯聚舍利本是穢身究愚怒暴嫉妬陰謀敗道壞德今母能拔女人究竟愚之穢身興丈夫行獲應真道遷靈本無何其健哉告比丘衆及諸理家宜共興廟應修供養僉曰唯然於是四衆天人鬼龍造廟立刹種種供養摩訶波闍波提齊言大雜阿愛道也亦名瞿曇彌

舍經云是難陀親母又增一阿舍經云佛告阿難難陀羅云汝等舉大愛道身我當親自供養尔時釋提桓因毗沙門王等前白佛言唯願勿自勞神我等自當供養佛言止止所必然者父母生子多有所益長養恩重乳哺懷抱要當報恩不得不報過去未來諸佛母

經七

十六

先取滅度諸佛皆自供養耶維舍利也時毗沙門天王使諸鬼神往栴檀林取栴檀薪至曠野之間佛躬自舉牀一脚羅云舉一脚阿難舉一脚難陀舉一脚飛在虛空往至塚間其中四部衆舉五百比丘尼舍利俱至塚間余時佛自取栴檀木著大愛道身上佛言有

四人應起塔供養一者佛二者辟支佛三者漏盡羅漢四者轉輪聖王皆以十善化物故余時人民即取舍利各起塔供養祐尋姨母爲德恩均所生是以持舉之重爰酬鞠育所以勸報復勵無恩人也

釋迦種滅宿業緣記第十八 出長阿含經

余時波斯匿王新紹王位便作是念我今新紹王位先應取釋種家女即告一臣曰往迦毗羅衛至釋種家持我名字告彼釋種云波斯匿王問訊興居輕利致問無量又語彼釋吾欲取釋種女設與我者抱德無已苦見違者當以力相逼大臣受教往告迦毗羅衛國

余時釋種五百人集在一處是時大臣至釋種所具宣王言釋種聞已極生瞋恚吾等大姓何緣當與婢子結親其衆中或言當與或言不可與余時摩訶男語衆人言諸賢勿共瞋恚所以然者波斯匿王爲人暴惡或壞我國界我今躬自當往與共相見說此事情時

綵七

十七

摩訶男家中婢生一女面貌端正世之希有沐浴此女與著好衣戴羽葆車送與波斯匿王又白王言此是我女可共成親時波斯匿王得此女已極懷歡喜即立此女爲第一夫人未經數日而身懷姪後生一男兒端正無雙世之殊特時波斯匿王集諸相師與子立字時相師言大王當知求夫人時諸釋共諍或言不與使彼此流離今當立字名曰流離時波斯匿王愛此流離太子未曾去前年向八歲王告之曰汝今已大可詣迦毗羅衛學諸射術是時波斯匿王給使諸人乘大白象往詣釋種至摩訶男家而白言曰波斯匿王使我至此學諸射術唯願祖父母事事教授時摩訶男報言欲學術者善可習之是時摩訶男釋種集五百童子使共學術時流離太子共學射術余時迦毗羅衛城中新起一講堂自相謂言今此講堂成來未久盡彩已竟猶如天宮我等先應往請如來於中供養及

比丘僧當令我等受福無窮然後我等當入此堂時諸釋種即於堂上敷種種坐具懸繒
燔蓋香汁灑地燒衆名香復儲好水然諸明
燈是時流離太子往至講堂即昇師子之座
時諸釋種見之極懷瞋恚即前捉臂逐出門
外各共罵之此婢生物敢入中坐撲之著地
是時流離太子即從地起長嘆息而視於後
是時有梵志子名曰好苦流離太子語好苦
梵志子曰此諸釋種捉我毀辱乃至於斯我
後紹王位時汝當告我此事是時好苦梵志
子報曰如教是時波斯匿王命終便立流離
太子爲王時好苦梵志往至王所而作是說
王當憶本諸釋所毀辱不時流離王報曰我
憶本事時流離王興起瞋恚勦諸羣臣汝等
速嚴駕集四部兵吾欲往征釋種諸臣即受
王教令即雲集四種之兵往至迦毗羅越爾
時衆多比丘聞流離王往征釋種具白卅尊
是時卅尊聞此語已即往逆流離王便在一

綵七

十八

枯樹下無有枝葉於中結跏趺坐時流離王
遙見卅尊即下車禮足在一面立尔時流離
王白卅尊言更有好樹枝葉繁茂何故在此
枯樹下坐卅尊告曰親族之蔭故勝外人是
時流離王便作是念今日卅尊故爲親族吾
不應往征宜可齊此還歸本土是時好苦梵
志復白王曰王當憶本釋種所辱王聞此語
已復更集兵復詣迦毗羅越大目犍連聞流
離王往征釋種白卅尊言今日流離王往攻
釋種我今堪任使流離王及四部兵擲著他
方世界卅尊告曰汝豈能取釋種宿緣著他
方世界乎時目連白佛言實不堪任使宿因
緣著他方世界尔時卅尊語目連曰汝還就
坐目連復白佛言我今堪任移此迦毗羅越
著虛空中乎目連報言卅尊我不堪任佛告
目連汝今還就本位目連復白佛言唯願聽
許能以鐵籠覆迦毗羅越城上卅尊告曰云

何目連能以鐵鎧覆釋種宿緣乎目連白佛不也世尊佛告目連釋種今日宿緣已熟今當受報是時流離王往詣迦毗羅越時諸釋種集四部之衆一由旬中往逆流離王是時諸釋一由旬內遙射流離王或射耳孔不傷其耳或射頭髮不傷其頭或射弓絃不傷其

經七

大

人或射鎧器不傷其人或射床座不傷其人或射車壞輪不害其人或壞幢麾不害其人是時流離王見此事已便懷恐怖告羣臣曰汝等觀此箭爲從何來羣臣報曰此諸釋種去此一由旬中射箭使來流離王報言彼設發心欲害我者並當死盡宜可於中還歸舍衛是時好苦梵志前白王言大王勿懼此諸釋種皆共持戒虫尚不害況害人乎今宜前進必壞釋種是時流離王漸漸前進向彼釋種是時諸釋退入城中時流離王在城外住而告之曰汝等速開城門若不爾者盡當煞汝時迦毗羅越城有釋童子年向十五名曰

奢摩闍流離王今在城外即著鎧持仗往至城上獨與流離王共鬪是時奢摩童子多殺害人衆各各馳散並作是說此是何人爲是天耶爲是鬼神耶遙見如似小兒是時流離王便懷恐怖即入地孔避之時釋種等聞壞流離王衆是時諸釋即呼奢摩童子而告之曰汝年幼小何故辱我等門戶豈不知諸釋修行善法乎我等尚不能害一虫蟻命況復人耶我等亦能壞此軍衆一人敵萬人然我等復作是念殺害人命死入地獄若生人中壽命極短汝速出去不須住此是時奢摩童子即出國去是時流離王復至門中速開城門不須誓留是時諸釋自相謂言可與開門爲不可乎尔時弊魔波旬作一釋形告諸釋言汝等速開城門勿共受困是時諸釋即開城門時流離王告羣臣曰今此釋衆人民極多非刀劍所能害盡悉取埋脚地中然後使暴象踏殺尔時羣臣受王教勑即以象踏殺

之時流離王勑羣臣曰汝等速選面手釋女
取五百人時諸臣等受王教令即選五百端
正女人將詣王所是時摩訶男釋至流離王
所而作是說當從我願流離王言欲何等願
摩訶男曰我今沒在水底隨我遲疾使諸釋
種並得逃走若我出水隨意殺之流離王曰

綵七

三十一

此事大佳是時摩訶男釋即入水底以頭髮
繫樹根而取命終是時城中諸釋從東門出
復從南門入或從南門出還北門入是時流
離王告羣臣曰摩訶男父何故隱在水中如
今不出余時諸臣聞王教令即入水中出之
摩訶男已取命終余時流離王以見摩訶男
命終王方生悔心我今祖父已取命終皆由
愛親族故設當知者終不來攻伐此釋種是
時流離王殺九千九百九十九萬人流血成河
繞迦毗羅衛城往詣尼拘留園中是時流離王
語五百釋女言汝等慎莫愁憂我是汝夫
汝是我婦要當相接時流離王捉一釋女而

欲捺之時女曰大王欲何所爲時王報言欲
與汝情通女曰我今何故與婢生種情通是
時流離王甚懷瞋恚勑羣臣曰速取此女別
其手足著深坑中諸臣受教別其手足擲著
坑中及五百女人皆罵王言誰持此身與婢
生種共交通耶時王瞋恚盡取五百釋女別
其手足著深坑中是流離王壞迦毗羅越已
還詣舍衛城余時祇陀太子在深宮中與諸
妓女共相娛樂王聞作妓聲即勑御者汝迴
此象詣太子所是時守門人遇見王來而白
王言王小徐行祇陀太子今在宮中自娛勿
相觸燒是時流離王即時拔劍取守門人殺
綵七

三十二

之祇陀王子聞流離王在門外便出與王相
見善來大王可入小停駕時流離王報言豈
不知吾與諸釋共鬪乎祇陀對曰聞之流離
王報言汝今何故與妓女遊戲而不佐我耶
祇陀報言我不堪任殺害衆生是時流離王
極懷瞋恚即復拔劍斫殺祇陀余時世尊以

天眼觀祇陁王子以取命終生三十三天是時五百釋女自歸稱喚如來名號如來於此生亦從此間出家學道而後成佛今受此毒痛極苦世尊何故而不見憶爾時世尊以天耳清徹聞諸釋女稱怨向佛將諸比丘往至迦毗羅越時五百釋女遙見世尊將諸比丘來到其邊皆懷慚愧爾時世尊語釋提桓因言此諸釋女皆懷慚愧釋提桓因即以天衣覆諸女上尔時世尊而語毗沙門王言此諸女人飢渴日久毗沙門王即辦自然天食與諸釋女皆自充足世尊漸與諸女說微妙法苦集盡道盡與說之尔時諸女塵垢即盡得法眼淨各於其所而取命終皆生天上

余時世尊詣城東門見城中烟火洞然尔時世尊往詣尼拘留園中坐告諸比丘我昔在中與諸比丘說法如今空虛無有人民自今已後如來皆更不復至此從座起去往舍衛祇樹給孤獨園告諸比丘今流離王及此兵

衆却後七日盡當磨滅是時流離王聞世尊記聞已恐怖告羣臣曰如來今記却後七日我及兵衆盡當滅沒等可觀外境無有盜賊水火災變未侵國者何以故知佛如來語言無有二尔時好苦梵志尋白王言大王勿生恐懼今外境無難亦無災變今日大王快自娛樂流離王言梵志當知佛言無異時流離王使人數日至七日頭王大歡喜踊躍不能自勝將諸兵衆及諸妓女往阿脂羅河側而自娛樂即於彼處卒大雷震非時雲起暴雨疾雨時流離王及諸兵衆爲水所濫皆悉消滅身壞命終入阿鼻地獄復有天火燒城

絰七
廿三

內宮殿尔時世尊以天眼觀見流離王及四兵衆悉皆命終入地獄中尔時比丘白世尊言流離王及四部兵今已命終爲生何處世尊告曰流離王者今入阿鼻獄中諸比丘白言今此諸釋昔日作何因緣今爲流離王所害尔時世尊告諸比丘昔日之時此羅閱城

中有捕魚村時世飢儉人食草根一升金貨
一升米彼村中有大池水又復饒魚時羅閱
城中人民之類往至池中捕魚食之當於余
時水中有二種魚一名拘瓈二名多舌是時
二魚各相謂言我等於此衆中先無過失我
是水性之虫不處乾地此人民之類皆來食
噉我等設前世時少有福德者其當報怨余
時村中有一小兒年向八歲亦不捕魚復非
害命然復收魚在於岸上小兒見已極懷歡
喜比丘當知余時羅閱城中人民之類豈異
人乎今釋種是也時拘瓈魚者今流離王是
兩舌魚者今好苦梵志是小兒見魚笑者今
我身是余時釋種坐取魚食無數劫中受地
獄苦今受此對我余時坐見而笑之今患頭
痛如似石壓猶如以頭戴須彌山所以然者
如來更不受形已捨衆行度諸厄難是諸比
丘由此因緣今受此報

釋迦畢罪經與此大同小異云流離王滅諸

綵七

大三

釋種旋師罷軍遣使者致敬於佛佛視使者
答言王自受矣阿難整法服稽首白言佛不
虛視其必有緣衆祐曰釋罪畢矣却後七日
太山鬼神以火逼王及其臣民王罪難救如
釋禍難禳也王行湖邊軍衆入水浴神化爲
毒蟲蠍其王衆毒行身腫或於水中死者或
百步一里死者垂半入國亮鬼雲集宮中夜
魅鳴聚居宮相待日月博蝕星宿失度怪異
首尾王聞佛戒災變之異內如湯灼會目議
論或言投山者或言投川者王遂乘船入海
強富者得從貧羸者留國王內宮人解衣脫
陽燧珠著船服上其日雲興笮絕舟瀨臣民
僉曰弊王行亮乃致斯禍向中之時日出多
陽燧出火始燒王舟投水即沒雷震霹靂即
入太山地獄留在岸上者微怖而全法句譬
經云佛弟子名曰目連見流離王伐舍夷國
以報宿怨當煞四輩弟子念甚可憐便到佛
所白言流離王征舍夷國我欲以四方便救

舍夷國人一者舉舍夷國人著虛空中二者舉舍夷國中人著海中三者舉舍夷國人著

兩鐵圍山間四者舉舍夷國人著他方大國
中央令流離王不知其處佛告目連雖知汝
有是智德能安處舍夷國人衆生有七不可
避何謂爲七一者生二者老三者病四者死

五者罪六者福七者因緣此七事意雖欲避不得自在如汝威神可得作此四宿對罪負不可得離於是目連禮佛便去猶意不已即取舍夷國人知識檀越四五千人盛著鉢中舉著虛空星宿之際流離王伐舍夷國殺三億人已引軍還國於是目連往到佛所爲佛

作禮自貢高曰流離王伐舍夷國弟子承佛
威神救舍夷國四五千人今在虛空皆盡得
脫佛告目連汝爲往看鉢中人不答曰未往
視之佛言卿先往視鉢中人還目連以道力
下鉢見鉢中人皆死於是目連悵然悲泣還
白佛言鉢中人者今皆死盡佛告目連有業

釋迦譜卷第七 綵七

定也座上無殃數人聞佛說無常法欣然得
道逮須陀洹果
祐竊惟大聖垂經抑揚懲勸夫以正覺之尊
萬累久絕經累塵劫而甫示餘報明知釋種
之滅非力能免斯實止殺之深戒慎業之明
規也